


### **Ulasan Buku / Book Review**



**Islam dan Melayu dalam Perlembagaan: Tiang Seri Hubungan Etnik di Malaysia**  
oleh Nazri Muslim, Penerbit UKM, Bangi 2014 (Cetakan Pertama) 285 halaman.  
ISBN 978-967-412-185-3

Kebanyakan bahan bacaan berkaitan perlembagaan yang ada di sekitar kita selama ini, adalah terbitan Bahasa Inggeris. Dalam mendepani isu isu berkaitan Islam dan Melayu yang merupakan perkara sensitif di kalangan masyarakat Melayu khususnya dan rakyat Malaysia amnya, penerbitan sebuah buku dalam Bahasa Melayu adalah sesuatu yang sangat dinantikan. Justeru, buku “Islam dan Melayu dalam Perlembagaan: Tiang Seri Hubungan Etnik di Malaysia” yang ditulis oleh Nazri Muslim diangkat untuk diulas dalam Jurnal MALIM edisi kali ini.

Buku terbitan Penerbit UKM yang mengandungi 285 halaman ini terangkum 6 bab yang dihasilkan dari penyuntingan asal tesis PhD beliau. Nazri Muslim menyedari akan perihal pentingnya penerbitan sebuah buku yang mampu mengupas isu Islam dan Melayu dalam Perlembagaan Malaysia dengan penggunaan Bahasa Melayu yang mudah dicerna tanpa penggunaan istilah teknikal dan jargon undang-undang berat yang menyerabutkan khalayak awam. Seluruh karya di dalam buku ini berkisar tentang dua tiang seri utama dalam Perlembagaan Persekutuan iaitu islam dan orang Melayu yang acapkali menjadi perkara berbangkit di kalangan masyarakat berbilang kaum. Pendekatan Nazri merungkai dua isu besar ini disampaikan melalui sudut pandang hubungan etnik di Malaysia dengan disangga oleh data data yang bersifat empirikal.

Bagi pembuka helaian, Bab 1 memberikan pendahuluan yang berupa liputan asas seputar keseluruhan intipati buku dengan babnya yang berjudul “Islam, Melayu dan Hubungan Etnik dalam Perlembagaan Persekutuan”. Bab ini mengupas secara menyeluruh terhadap perkembangan sepantas lalu Islam dan Melayu dalam perlembagaan, dengan membawa sisipan dan tulisan tulisan awal berkeraan perlembagaan dan perkara berbangkit yang telah

diwacanakan dalam terbitan terbitan terdahulu. Cara persembahan yang santai dalam bahasa yang mudah beserta lenggok perbincangan yang lancar dalam susunan disusun rapi menjadikan Bab awal ini mudah untuk dihadam.

Seterusnya Bab 2 cuba untuk membawa pembaca menghayati kepentingan Islam dalam konteks negara kita, terutamanya berkisar dalam hal-hal berkaitan Hubungan Etnik. Dalam babnya “Perspektif Islam dan Transformasi Hubungan Etnik di Malaysia”, Nazri telah berjaya mengeluarkan intipati al-Quran dan al-Hadith yang berkaitan Hubungan Etnik, di samping mengulas konsep-konsep seperti keadilan, kontrak sosial, teori teori asas hubungan etnik dan kesamarataan dari sisi Barat dan kemudiannya dipersembahkan kepada pembaca dalam kerangka suatu pendekatan dari perspektif Islam yang lebih menyeluruh dan inklusif.

Bab ke 3 pula memperihalkan tajuk “Perlembagaan Persekutuan dari Perspektif Hubungan di Malaysia” yang mana penulis telah membawa kepada kita sorotan definisi dan perkembangan perlembagaan yang ada pada kita pada hari ini. Penulis telah merungkai satu per satu peristiwa penting dalam susur galur pembinaan perlembagaan; antaranya sejarah Malayan Union, pihak pihak yang bersetuju dalam ikatan kontrak sosial, dan elemen elemen yang menjadi pasak yang penting dalam perlembagaan seperti Islam dan Melayu yang patut para pembaca semua tekuni.

Bab 4 tampil memberikan pemerihalan terperinci tentang makna Islam dan Melayu dalam perlembagaan dan kesannya kepada semua pihak. Nazri telah menjelaskan dengan baik dalam bab “Islam dan Orang Melayu: Tiang Seri Pelembagaan Persekutuan” ini berkaitan kesan kesan Islam dan Melayu dalam perlaksanaan pentadbiran negara yang meliputi antaranya dasar-dasar negara, proses dan kuota pengisian penjawat awam, keperluan memenuhi tuntutan Islam dalam hal ehwal melibatkan perkara kermasian, khususnya dalam kalangan masyarakat Melayu dan kedudukan istimewa Raja Raja Melayu serta kedaulatan Bahasa Melayu.

Nazri dalam Bab 5 buku ini yang bertajuk “Memasyarakatkan Perlembagaan” membawa kita meninjau dan memahami kajian yang dilakukan oleh penulis dalam mencerap pemahaman masyarakat terhadap Islam dan Melayu dalam Perlembagaan Persekutuan. Seramai 800 responden telah diambil penulis untuk disukat tahap pengetahuan, kefahaman dan penerimaan mereka terhadap Islam dan Melayu dalam Perlembagaan serta perkara perkara berbangkit. Hasilnya dibentangkan dalam jadual jadual ringkas serta sela kategori yang berbeza-beza yang menjadikan pemahaman lebih mudah untuk difahami.

Dalam Bab terakhir, Bab 6 yang berbunyi, “Masa Depan Islam dan Melayu dari Perspektif Hubungan Etnik”, penulis telah mengutarakan suatu kesimpulan akan perihal pentingnya Islam dan Melayu dalam konteks hubungan etnik yang ada di negara kita, serta mengangkat kepentingan kedudukan Islam dan Melayu untuk diletakkan di tempat yang sepatutnya.

Demikianlah sebuah buku dalam aspek perlembagaan yang dapat dikongsi bersama dalam ruangan ulasan buku kali ini. Keseluruhan bab-bab yang dimuatkan jelas menampilkan fakta-fakta dan rujukan yang menjadi asas penting untuk kita memahami Islam dan Melayu dalam Perlembagaan. Penerbitan buku ini membantu menyebarluaskan kesedaran dan kefahaman umum akan tiang seri utama dalam perlembagaan negara kita ini serta mampu untuk memberi penjelasan serta menjadi panduan untuk penerimaannya dalam kalangan masyarakat. Jelaslah penghasilan buku “Islam dan Melayu dalam Perlembagaan: Tiang Seri Hubungan Etnik di Malaysia” ini telah berjaya mengisi kelompongan perbahasan dalam Bahasa Melayu dan mampu untuk menjadi pemangkin ke arah memasyarakatkan perlembagaan dalam konteks Hubungan Etnik.

JAMSARI ALIAS  
Pusat Citra Universiti,  
Universiti Kebangsaan Malaysia (UKM)  
43600 Bangi, Selangor  
Malaysia  
E-mail: [jamsari@ukm.my](mailto:jamsari@ukm.my)

NORAZILA MAT  
Fakulti Ekonomi dan Pengurusan,  
Universiti Kebangsaan Malaysia (UKM)  
43600 Bangi, Selangor  
Malaysia  
E-mail: [norazila@ukm.my](mailto:norazila@ukm.my)